

聖朝名公奏議
函一冊

請變通奉天運糧章程疏

陳鴻翔

竊惟舊章莫患乎紛更。而積弊必期於裁革。易曰窮則變。變則通。通則久。自古及今。治法胥准乎此也。現在直隸督臣奏請變通奉天米豆運津章程。已經飭部議覆矣。臣於上年七月曾將奉天辦運遲延各情。詳細肅陳。請將補運粟米及本年正運之米。趕緊並運。以濟賑需。迨至冬間。兩運米石。仍未能備齊交兌。該省將軍府尹。並有寬免各州縣處分之請。是其疲玩情形。亦可概見。臣伏思牛莊正運米石。歷經遵辦。似未可遽議更張。若錦寧廣義。初運次運。似可變通辦理。以除積弊。查此項米豆。本係年前征收。次年起運。當小民交納之時。該州僅止允收本色百餘石。其餘概收折色。且一石之米。須交兩石之價。方能完納。此收米之弊也。征收之後。該州縣並不及時買米存倉。迨

次年起運。屆期現買價賤之米。頂補貽累商船。此備米之弊也。商船赴奉天起運。四月即須出口。十月始得駛回。守候日久。糜費難堪。該州縣每藉口於船未到齊。不行開兌。甚至河凍空回。次年再行補運。此兌米之弊也。至由津運通。官吏之驗收挑撥。駁船之偷漏攙扣。勢難禁絕。此交米之弊也。到倉之後。糠粃相雜。霉變居多。終至不堪食用。即使按成搭放。究屬有名無實。此放米之弊也。上年五城各廠賑米。屢請更換。是其明徵。以有用之銀錢。易無用之米豆。良可惜矣。臣愚以為欲除其弊。莫若即令奉天錦甯廣義各州縣。改交折色。較為簡便。或云官價有限。若改折色。為數無幾。然若令其按時價折扣。官民似亦兩便。再以所得折價。就近在通州採買交倉。又省許多周轉。即有弊端。亦尚易防。所有海程及外河內河各水脚。以及奉省各州縣運

費並押運各委員薪水等項省費甚多。亦可貼補改折之不足也。且南省漕糧改辦折色者甚多。即山東上年漕米亦改折色。是改折亦變通盡利之一道。可否
飭下戶部將奉天錦寧廣義四州縣之米豆改收折色。與直隸督臣所請一併核議。倘能杜絕弊端。永遠遵行。則米豆庶可歸實用矣。臣愚昧之見。是否有當。伏乞
皇太后 皇上聖鑒謹奏。

請飭禁崇文門稅務需索疏內閣侍讀學士 鍾佩賢

竊惟征收稅課向有定則。本不准例外苛求。伏讀道光二年

上諭。御史許乃濟奏請嚴禁崇文門稅局需索蠹弊一摺。所奏甚是。崇文門稅局於尋常行李往來。不論有無貨物。每衣箱一隻勒索銀二兩四錢。至八兩之多。或偶然攜帶常用物件。不知應稅料則一經查出。輒以二十倍議罰。即有照例開報納

稅者又以輸課無多。仍百計刁難。否則押赴官店守候。不准放行。京師為萬方輻輳之區。乃經書役任意婪索。苛及行旅。若此不可不嚴申禁令。着該督遵照定例。於崇文門及分口巡查之蘆溝橋、東壩板橋、海淀等處。一律添設木榜。仍著順天府刊刷。科則定例。每年頒發。俾眾咸知。並責成巡視五城御史。隨時前往認真稽查。如有濫行需索。擾及行旅情事。即據實參奏。不得日久視為具文。務期革除積弊。以懲關蠹而便商旅。欽此。

聖訓煌煌。允宜永遠遵守。臣聞近數年來。崇文門於應征稅課之外。遇有送務車輛。雖無貨物。亦必索銀。若外任及出差回京官員。不論有無稅貨。亦不論行李多寡。輒量其缺分差使之肥瘠。勒令交銀若干。名曰報效。即候補候選之微員進京。亦皆不免。夫稅局之設有貨則納稅。無貨則放行。遵例納稅。何得謂

之報效。報效云者。蓋本無應納之稅。而強令輸銀之謂也。在官員果有餘資。報效亦固其分。但崇文門並非捐局。納稅並非捐輸。報效二字。已非稅局所宜言。然尚未聞擾及會試公車也。近日竟有會試士子進京。除隨身行李外。別無一物。並無衣箱。到務後。再三懇求查驗。堅不允從。仍每人勒索銀十餘兩。及四五兩不等。方准放行。稍不遂意。即置之官店。更可異者。甫抵城門。而門上官役。先勒取多金。方許送務。各該士子。本多寒素。跋涉數千里來京。又當賊氛未靖。時慮道梗。或先期數月。趕到候試。或中途聞警。繞道前進。川資旅費。已屬不易。何堪復受此擾累。且國家掄才大典。多士踴躍觀光。而若輩敢於輦轂之下。肆行婪索。於政體大有關係。臣訪聞既確。不敢緘默。應請飭下崇文門監督申明定例。嚴飭官吏巡役人等。凡遇送務車輛。

只有行李並無貨物者。立予查驗放行。如敢留難勒捐。恣意需索。查出按律懲辦。其各城門向無收稅之責。訛詐銀兩。情殊可惡。尤應一體嚴禁。仍遵照道光二年

諭旨。責成五城御史

認真稽查。如有前項情弊。隨時參奏。至稅局惟應按則收稅。嚴查偷漏。報效名目。亦宜革除。以杜影射侵欺之弊。臣為剔除關蠹起見。是否有當。伏乞

皇太后

皇上聖鑒。謹奏

請裁撤權宜之政疏

左副都御史全慶

竊自軍興以來。餉需浩煩。不能不借資民力。故捐輸之外。復行畝捐厘捐。名目不一。皆一時權宜之計也。然商賈輻輳之區。辦理厘捐。未嘗無補。至於僻處偏隅。復設分局抽厘之數。除去開銷。所存無幾。在民間已多窮困。而厘局務盡錙銖。萬一滋生事端。所得不償所失。求利反害。其弊顯然。川省藍季二逆。其始因

抗厘聚眾滋擾彌年遂至蔓延數省昇其明証蓋厘局之設或用紳董或用委員任事者固有其人中飽者尤復不少至吏胥訛索包攬更不待言我

皇上體恤民隱洞悉弊源於內外

臣工奏參各省厘局舞弊迭加訓飭不啻三令五申而其

弊未能盡革者以軍務未竣得所藉口也今仰賴

天威金

陵業經克復兵勇可以陸續凱撤軍餉即可陸續節省鹽關可以逐漸足額厘局即可逐漸減裁從前湖北江北釐務經御史朱文江丁紹周先後條奏奉

旨交查迄未裁減自為籌濟

軍餉起見今日軍務情形與去年迥異自宜分別辦理臣聞江西廣東兩省抽收厘金接濟江南頗形掣肘久在

聖明洞

鑒之中又聞上年廣東有高州紳士前往廉州府城勸捐抽厘因委員辦理不善致該紳被毀幾釀人命莫得主名至今案懸

未結其餘佛山石龍蘆包等廠於咸豐九年曾經滋事所抽厘金逐年有減無增走漏侵吞弊端百出臣前在道光年間曾任廣東學政周歷各府察看情形查雷廉瓊三府素稱瘠土逼近海陬既非通衢又鮮殷戶即開局抽厘所收有限而民風强悍滋事實屬可虞無益於軍需有害於大局殊非良策也竊思廣東一省如此他省諒可概見擬請

飭下戶部通盤籌畫將

各省報設厘局詳查酌核實係通都大邑商賈輻輳之區如直隸之天津山東之煙台江南之上海湖北之漢口江西之河口九江福建之廈門浙江之寧波等處歲入可得鉅萬者酌留若干處權准照舊抽收以為辦理善後之用俟善後辦竣再行酌量情形陸續裁汰至其餘各省僻壤偏隅分設厘局如廣東雷廉瓊等處之素稱瘠土者無論曾否奏咨有案併請概令裁撤

嗣後不准再行添設。如有私立厘局者。重治其罪。可否明降諭旨。嚴飭中外。務以愛民休養為先。不得條陳言利。以恤閭閻而固根本。庶幾上格天心。下孚民望。而餘氛不難迅掃矣。臣愚昧之見。是否有當。伏乞
皇太后
皇上聖鑒訓示
謹奏。

請裁戶捐鋪捐片

給事中 王憲成

再軍興以來。需餉浩煩。設立各項捐輸。名目其取之民者。若厘捐。若戶捐。若鋪捐。幾於竭澤而漁。今江省肅清。而瘡痍滿目。子遺之民。尚未復業。要在去其疾苦。而予以生機。故近日廷臣有裁撤各省分設厘局之奏。夫厘局分設。卡座星羅棋布。害及行旅。害不及居者也。若戶捐。則計畝捐錢。鋪捐。則挨鋪捐錢。委員旁午。期限促迫。無不受其害者。在軍務吃緊之時。勢非得已。且

地方未遭兵燹。民力尚可勉強支持。若經賊竄擾之後。農田多半荒蕪。牛種均須措辦。而猶計畝捐錢。析及錙銖窮民其何以堪。是戶捐不可不裁也。至於蕩析離居之眾。甫歸田里。屋宇草創。開設鋪面。生意甚微。如仍挨鋪捐錢。多方剝削。諸物益加昂貴。民間度日。更覺艱難。是鋪捐不可不裁也。蓋戶捐鋪捐之當裁。更急於厘捐矣。可否飭下部臣核議。以蘇民困。伏候聖裁。臣愚昧之見。是否有當。謹附片具奏。

奏荒產宜設法杜弊疏

御史朱澄淵

伏讀同治二年十一月欽奉

上諭著各該督撫於新復各

處督飭各該州縣確切查明實在逆產入官其荒廢地畝有原業主者即行給領尚未查得業主者即著暫行造冊登記俟業主續歸再行給還等因欽此仰見我皇上軫念窮黎無微不至跪誦之下淪浹難名查無主荒田原應暫為官地俟業主續歸時領還亦必辦理得宜方能無弊現飭各督撫妥議章程自能悉心籌畫茲就管見謹擬防弊四條為我皇上敬陳之

皇上敬陳

一呈報宜寬予歲時也各省道途梗塞文報遲延若期限過嚴恐各業主或流落遠方未能趕到或逗留僻壤不易即知必有因逾期而勢難給領者且恐留難訛詐之風日長欲除此弊似

不必預定日期。凡業主續歸領田者。俱俟到籍後。限半年內具呈報官。即令里鄰親族。或佃戶。及從前取租人。各取切實保結。並聲明呈報。有無遲悞緣由。再由該管官。妥速催勘申詳。將田批給各業主存案。不准藉端滋擾。以恤流離。

一。認領難盡憑冊契也。外省田畝較多之業主。半係祖產留貽。或且窮鄉寫遠。更多有托人照管者。故地段四址。田主每未能盡知。所恃者。惟糧戶冊。及買田紅契耳。地方遭兵後。糧冊田契。類已遺亡。尤恐有同姓者竊獲。頂名捏造者。奪真攬利。欲除此弊。仍不必盡憑冊契。惟各取切實保結。並聲明現在有無冊契緣由。再由該管官確查後。即行另立冊給契。以絕紛爭。

一。逆產與非逆產。當嚴辨也。逆產例應入官。特恐貪劣各員。幸民田入官。為易於分肥。計將賊所強據。賊所取租。及與賊稍有

毘連交涉。或毫無瓜葛。各荒田訛斷入官。田主不敢自明。必多失業。欲除此弊。惟於逆產入官時。亦各取切實保結。聲明實無誣逆情弊。再由該管官確訪得實。方准永遠入官。庶荒田不敢概行籍沒矣。

一。田主與偽田主。必密查也。荒田尚無業主。恐有詭充業主者。租戶之侵吞。土豪之兼并。均可虞也。官或悞信於前。勢必飾非於後。原主續歸日。其懦弱者。畏見官司。每致鳩據鵲巢。莫由分辨。欲除此弊。凡業主領田時。俱令取切實保結。即當時已有原業主者。亦必令聲明實無私占。與假冒情弊。再由該管官確驗給收。如有占冒者。從重治罪。庶荒田不致互相竊取矣。以上四條。除嚴禁吏胥人等。毋庸干預擾民外。均責成里鄰親族。及各人証切實作保。再嚴飭地方官。秉公認真查辦。倘劣員或奸

徒有徇隱侵漁把持婪索者。即飭該管上司官查拿懲辦。以儆其餘。並先通行示諭軍民人等知悉。俾不敢營私霸產預彈刁風。臣愚昧之見。可否請

併妥議具奏。伏乞

皇太后

皇上聖鑒。訓示遵行。謹奏

請免軍需造冊報銷疏

大學士管理戶部倭仁

竊惟軍需支用。款目冗煩。鹽糧米折。事隸戶部。弁兵員名。製造丈尺。事隸兵部。工部。開支多寡。各有定章。此軍需報銷。必以則例為斷也。而其間制變因時。亦有未能悉遵之處。破格懸賞。支放既難。緩須臾。循例開銷。造冊則皆非實在。是名以則例為斷。而未必皆支用之實也。自洪逆倡亂以來。蔓延十數省。滋擾十餘年。捻教回苗。乘機迭起。生民塗炭。宵旰憂勞。仰賴

皇太后

皇上至誠感神。天心厭亂。巨逆就殄。東南漸次

蕩平。西北可期底定。惟肅清之日從此始。而報銷之事從此煩。歷年以來。各省軍需承辦。既非一人。轉戰動經數省。且則例所載征調。但指兵丁。而此次成功。多資勇力。兵與勇本不相同。例與案遂相歧出。在臣部引例核案。往返駁查。不過求其造報如例而止。要不能於已支之帑項。再求節省。而各處書吏。藉此需索。其屬防不勝防。糧臺委員。藉以招搖。甚至費外加費。費無所出。則浮銷苛歛之弊興。浮銷云何。勸捐歸補所由影射也。苛歛云何。私設釐卡所由取給也。聖人在上。方將登斯民於衽席。忍令於大功告成之後。復留此病國病民之政。而不除乎。此軍需報銷一事。所急宜變計者也。顧或者謂需索招搖等弊。宜思所以懲之。至報銷章程。遵行已久。何可因噎廢食。不知此次軍需歷時太久。各省財力俱竭。兵勇飢苦。情形屢見。章奏則軍

營之已無餘裕可知。於此而嚴飭報銷。其造冊按例定之數。不
溢一絲。而陰將款目浮開鉅萬者。與例既符。即在准銷之例。其
以實用之數登之銷冊。而並無絲毫浮冒者。例稍未符。即難核
准。應駁之款。或數十萬。或數百萬。甚且著落賠償。勞臣戰將。酬
庸於前。而追呼於後。無論力有未逮。恐亦非國家厚待勤舊之
心。然則報銷一事。即能弊絕風清。而實數不准銷。准銷非實數。
虛文相襲。甚無謂也。臣等公同商酌。所有同治三年六月以前
各處辦理軍需未經報銷各案。擬懇

天恩准將收支款目

總數分年分起開具簡明清單奏明存案免其造冊報銷如蒙

俞允應由臣部知照兵工兩部各衙門一體欽遵辦理並

請飭下各路統兵大臣各直省督撫永禁勸捐歸補名目

並將私設厘卡實力查叅裁撤以期案牘無作偽之情中外無